

JPJ mula guna dron teknologi tinggi di Kelantan

Machang: Jabatan Pengangkutan Jalan (JPJ) memperluaskan penggunaan dron berteknologi tinggi bagi memantau kesalahan pengguna jalan raya dan pelaksanaannya dimulakan di Kelantan.

Ketua Pengarahnya Datuk Aedy Fadly Ramli berkata, penggunaan dron berkenaan mampu membantu penguatkuasaan secara lebih berkesan dalam mengesan pelbagai kesalahan lalu lintas.

Katanya, dron berteknologi tinggi itu mampu melakukan pembesaran imej sehingga 200 kali, sekali gus membolehkan pegawai penguat kuasa melihat serta mengesan nombor pendaftaran kenderaan dengan jelas walaupun dari jarak jauh.

“Selain itu, dron ini juga mampu merakam serta menyimpan video dan gambar secara automatik melalui sistem storan yang disediakan bagi tujuan penguatkuasaan dan siasatan lanjut.

“Melalui rakaman berkenaan, anggota dan pegawai penguat kuasa boleh mengesan kesalahan yang dilakukan pengguna jalan raya dan ia akan dijadikan bukti sebelum tindakan diambil,” katanya.

Beliau berkata demikian kepada pemberita selepas menyempurnakan Perasmian Penutup Majlis Penerapan Nilai-Nilai Murni dan Majlis Singgah Sahur di Stesen Penguatkuasa (SPK) Labok di sini, semalam.

Katanya, bagi memastikan penggunaan dron yang selamat dan mematuhi peraturan, JPJ melatih anggota penguat kuasa sebagai pengendali dron bertauliah.

“Hanya anggota yang mempunyai lesen sah dibenarkan mengendalikan dron, manakala mereka yang tidak mempunyai lesen tidak dibenarkan berbuat demikian,” katanya.